

## Die kriehn uns nit kaputt!

Om letzde Sunndaach omm Stommdisch hawwe merr iwwer die Kolleeche von de Gewerkschaft Verdi gebabbelt, die streike due, weilse mehr Geld hawwe wolle, awwer iwwerhaupr nit droo denke, e onnerthalb Stund in de Woch länger ze schaffe.

Jawoll, hott de Schorsch gerufe, dess iss richdisch. Die Leit hawwe die gonz Zeit koon oonsische Cent dezu krieh, währendem die Bosse sich die Säckel vollgemacht hawwe. Jetz sinn emol die Kloone droo.

Acht Prozent iss awwer e bissi vill, hott de Karl gemoont, fünf dete aach longe.

No ja, sächt de Schorsch, die werrn sich wie immer in der Mitt treffe, so bei sechsehalb, doo kennse allminonner zefridde soi.

Ich habben oogeguckt: Allminonner zefridde? Du glaabst doch nit, moin liewer Schorsch, dass mir Rentner doodemett zefridde sinn.

De Schorsch hott de Kopp geschittelt: Was hotten dess mett uns ze due?

Sächt de Karl: Wie weil dann alles deirer werdd. Alles, wo ooner soi Hond droo leecht, werdd deirer, unn wer werdden dess alles bezahle? Nor mir, mir Rentner. Odder hott ooner von eich geheert, dass aach mir sechsehalb Prozent mehr Rente krieh?

Ich saach: Mir missde emol streike, weil von uns Rentner gib'ts joo mehr als 20 Millioone. Mir missde joo nit gleich e Audobohn blockiern. Awwer stellt eich emol vor, mir dete nor oo oonsich Woch nit Auto fahrn oder oo oonsich Woch nors Notwendichsde kaafe odder so was in der Art, doo det monches schnell onnerst werrn.

De Karl hott de Kopp geschittelt. Honnes, sowas krieh merr nit uff die Reih. Mir Rentner sinn doch die geduldichste Mensche dies gibt, mett uns kennese doch alles mache. Mir meckern, reeche uns uff unn dann? Dann sparn merr wie verrickt, halle unser Sach zesomme unn gleiche drei Prozent Inflation, Strom, Gas, Heizöl, Benzin unn Wasser onnerer onnern Stell widder aus. Doo werdd halt koo nei Audo kauft, nor noch zwaamol im Monat in die Werrtschaft gonge, die Reise werrn von zeh Daach uff sechs Daach gekerzt, die Heizung werdd erunnergedreht unn owends beim Fernsehgucke werdd e Kolter iwwer die Fieß geleecht. Naa, mir meckern nor, awwer losse uns alles gefalle.

Dass alles deirer werdd det uns joo nix ausmache, wenn merr e bissi Gold hädde, hott de Schorsch gesaat. Habder gelese, wie deier jetz dess Gold iss unn dass alles oogekauft werdd, aachs Gold von de Zäh? Ei wenn merr dess gewusst hätte, wie unser Tonte Erika gestorwe iss: die hadd uns ihr Goldzäh vermacht, die wusst warum. Awwer kooner wolltse hawwe, also hawwe merr se ihr ins Grab mettgewwe,

Ich habb gegrinst: Mir kennde joo in de Bayrische Wald fahrn unn dort Gold wäsche, dess wär doch was, odder nit?

De Karl druff: Doo konnsde aach gleich in doim Gadde bohrn obde Öl finne dust. Naa, dess oonziche was mir mache kenne iss sparn, so long, bis merr nor noch Quellkadofele esse unn Schwefelwasser drinke. Dess Wasser iss gesund unn kost nix.

Ich habb geflistert: Um Gotteswille, Karl, pscht! – dess derf kooner heern, grad jetz nit, wo die Stadt iwwerall guckt wo se egal woher Geld in die Kass krieh. Sunst dun die noch enn Automat on de Quell uffstelle unn erst wennde enn Euro enoischmeißt kimmmts Wasser eraus.

Unn habb dann laut gesaat: Unn trotzdem, die kriehn uns Alde nit kaputt, doo kennese grad mache wasse wolle.

Eiern Honnes